

支那
撰述

介菴禪師源流頌

C40
4514
(249)

960
1
2
3
4
5
6
7
8
9
70
1
2
3
4
5
6
7
8
9
80
1
2
3
4
5
6
7
8
9

C40-v514

了翁上座請大藏多有
家書置之於雲山
我徵笑瑤院垣府中未
為學者不敢許出院內
當由二世鐵牛機謹誌



B 64853

金明介菴種尚源流頌世序

西天

本祖釋迦世尊

始祖摩訶迦葉尊者

二祖阿難尊者

三祖商那和修尊者

四祖優波毘多尊者

五祖提多迦尊者

六祖彌遮迦尊者

七祖婆須密尊者



原...世序

八祖佛陀難提尊者

九祖伏馱密多尊者

十祖脇尊者

十一祖富那夜奢尊者

十二祖馬鳴尊者

十三祖迦毘摩羅尊者

十四祖龍樹尊者

十五祖迦那提婆尊者

十六祖羅睺羅多尊者

十七祖僧伽難提尊者

十八祖伽耶舍多尊者

十九祖鳩摩羅多尊者

二十祖闍夜多尊者

二十一祖婆修盤頭尊者

二十二祖摩拏羅尊者

二十三祖鶴勒那尊者

二十四祖師子尊者

二十五祖婆舍斯多尊者

二十六祖不如密多尊者

二十七祖般若多羅尊者

震旦

初祖菩提達磨大師

二祖慧可大師

三祖僧璨大師

四祖道信大師

五祖弘忍大師

六祖曹溪慧能大師

曹溪第二世南嶽懷讓禪師

曹溪第三世江西馬祖道一禪師

曹溪第四世洪州百丈山懷海禪師

曹溪第五世洪州黃檗山希運禪師

曹溪第六世鎮州臨濟義玄禪師

臨濟第二世魏府興化存獎禪師

臨濟第三世汝州南院慧顒禪師

臨濟第四世汝州風穴延沼禪師

臨濟第五世汝州首山省念禪師

臨濟第六世汾州太子院善昭禪師

臨濟第七世潭州石霜慈明楚圓禪師

臨濟第八世袁州楊岐方會禪師

臨濟第九世舒州白雲守端禪師

臨濟第十世蘄州五祖法演禪師

臨濟第十一世成都府佛果圓悟克勤禪師

臨濟第十二世平江府虎丘紹隆禪師

臨濟第十三世明州天童山應菴曇華禪師

臨濟第十四世明州天童山密菴成傑禪師

臨濟第十五世夔州府臥龍破菴祖先禪師

臨濟第十六世杭州徑山佛鑑無準師範禪師

臨濟第十七世杭州淨慈斷橋妙倫禪師

臨濟第十八世天台山瑞巖方山寶禪師

臨濟第十九世天台山華頂善興寺妙明真覺無

見先觀禪師

臨濟第二十世處州福林院白雲智度禪師

臨濟第二十一世太平府繁昌八峯山古拙俊禪

師

臨濟第二十二世四川東普州道林無際心禪師

臨濟第二十三世南京太崗月溪澄禪師

臨濟第二十四世太崗夷峯寧禪師

臨濟第二十五世天目山寶芳進禪師

臨濟第二十六世嘉興東塔野翁曉禪師

臨濟第二十七世秀州敬畏菴無趣如空禪師

臨濟第二十八世杭州徑山無幻性冲禪師

臨濟第二十九世秦溪興善寺南明慧廣禪師

臨濟第三十世建寧府紫雲山普明寺篤湖玄微

妙用禪師

介菴和尚源流頌

門人 真理
真本 等錄

同山居士曹 溶 閱

西天

本祖釋迦世尊在靈山會上拈花示衆是時人天百
萬衆皆默然唯迦葉尊者破顏微笑世尊曰吾有正
法眼藏涅槃妙心實相無相微妙法門不立文字教
外別傳付囑摩訶迦葉并勅阿難副貳傳化無令斷
絕付法偈曰法本法無法無法法亦法今付無法時

法法何曾法

頌曰霜天欲暮朔風寒 黃葉飄飄孰耐看

忽地晚鐘鳴古寺 一輪皎月出重巒

始祖摩訶迦葉尊者阿難一日問師兄世尊傳金襴袈裟外別傳箇什麼祖召阿難阿難應諾祖曰倒却門前刹竿著後祖欲入定雞足山乃召阿難言我今不久世間正法付囑于汝汝善守護付法偈曰法法本來法無法非法何于一法中有法有不法

金襴袈裟外別無傳 弟應兄呼夢不全

一段真風亘今昔 優曇朶朶火中鮮

二祖阿難尊者于恒河中流將入寂滅念先所度脫五百弟子悉皆來集中有弟子一名商那和修二名末田底迦祖告之曰昔如來以正法眼付大迦葉迦葉入定而付於我我今將滅用傳于汝付法偈曰本來付有法付了言無法各各須自悟悟了無無法說偈已復以正法眼囑累商那和修而謂末田底迦曰昔佛有記汝當于罽賓國敷宣大法

法湧恒河逝不休 一般心事動人愁

如來法眼親殃及 試看分支兩道流

三祖商那和修尊者化緣既久思付正法于吒利國

得弟子優波毘多以為給侍祖因問曰汝年幾耶荅曰我年十七祖曰汝身十七耶性十七耶荅曰師髮已白為髮白耶心白耶祖曰我但髮白非心白耳毘多曰我身十七非性十七也祖知是法器經三載以法眼付囑之付法偈曰非法亦非心無心亦無法說是心法時是法非心法

問南酌北露英才

口欵相隨欠一鎚

三載巾瓶無別囑

與師把手上高臺

四祖優波毘多尊者在世化導證果最多最後有一長者子名曰香衆禮祖求出家祖問曰汝心出家身

出家荅曰我來出家非為身心尊者曰不為身心復誰出家荅曰夫出家者無我我故無我我故即心不生滅心不生滅即是常道諸佛亦常心非形相其體亦然祖曰汝當大悟心自通達宜依佛法僧紹隆聖種因為剃度授具名提多迦且告之曰昔如來以正法眼藏次第傳授以至于我今復付汝付法偈曰心自本來心本心非有法有法有本心非心非本法

獅子全威便出羣

吼聲未許等閒聞

堂堂聖種真堪紹

次第傳流非世勲

五祖提多迦尊者行化中印度彼有仙名彌遮迦昔

撰述
與祖同生梵天遮迦遇阿私陀仙授之仙法祖則修
習禪那報分已經六劫以夙緣故捨邪歸正率衆求
解脫祖卽度之其衆亦一時發心祖以法眼付彌遮
迦而說偈曰通達本法心無法無非法悟了同未悟
無心亦無法

一念纔分萬劫殊 剎那回步便同途

雖能逐日追風疾 狼藉春光不較多

六祖彌遮迦尊者遊化至北天竺國於闐闐間遇一
人手持酒器逆祖問曰師何方來欲往何所祖曰從
自心來欲往無處曰識我手中物否祖曰此是觸器

而負淨者曰師識我否祖曰我卽不識識卽非我彼
卽置器禮祖自稱名婆須密願加度脫祖與剃度付
法偈曰無心無可得說得不名法若了心非心始解
心心法

越性顛狂咲傲頻 茫茫誰識甕頭春

攔街撞着剛知已 共醉桃源好避秦

七祖婆須密尊者常服淨衣執酒器遊行里閤或吟
或嘯人謂之狂遇六祖彌遮迦受法行化至迦摩羅
國有智者佛陀難提索祖論義祖曰仁者論卽不義
義卽不論若擬論義終非義論難提知祖義勝心卽

撰述
欽服祖說付法偈曰心同虛空界示等虛空法證得
虛空時無是無非法

額有圓珠長七尺 特來呈伎徹光輝

當機直示虛空法 撥入虛空絕是非

八祖佛陀難提尊者適提伽國毘舍羅長者家長者
作禮問何所須祖曰我求侍者長者曰我有二子各
伏馱密多年已五十口未曾言足未曾履祖曰如汝
所說真吾弟子伏馱聞之遽起禮拜而說得曰父母
非我親誰是最親者諸佛非我道誰是最道者祖以
偈荅曰汝言與心親父母非可比汝行與道合諸佛

心卽是外求有相佛與汝不相似欲識汝本心非合
亦非離伏馱聞偈便行七步隨祖出家付法偈曰虛
空無內外心法亦如此若了虛空故是達真如理

五十年來口不開 鵝王擇乳亦奇哉

剛行七步揚家醜 引得兒孫入禍胎

九祖伏馱密多尊者受八祖付囑至中印度有長者
香蓋携一子名難生禮祖曰曾有一仙謂此兒骨相
非常當爲法器今命出家祖與剃髮付戒錫磨之際
祥光燭座舍利現前自此精進忘疲未幾祖付法焉
偈曰真理本無名因名顯真理受得真實法非真亦

非偽

纔舉金刀頂相圓 祥光徧布耀人天

分明舍利人難覩 一領袈裟搭半肩

十祖脇尊者本名難生投九祖執侍左右脇不至席
因號脇尊者至華氏國憇一樹下有長者子名富那
夜奢合掌前立祖問曰汝從何來荅曰我心非往祖
曰汝何處住荅曰我心非止祖曰汝不定耶曰諸佛
亦然祖曰汝非諸佛曰諸佛亦非祖乃付法說偈曰
真體自然真因真說有理領得真真法無行亦非止
夙債來償自古衣 不投機處却投機

其中一語誰相請 夜半金烏撲地飛

十一祖富那夜奢尊者得法脇尊者尋請波羅奈國
彼有馬鳴大士作禮問曰我欲識佛何者卽是祖曰
汝欲識佛不識者是曰佛既不識焉知是乎祖曰旣
不識佛焉知不是曰此是鋸義祖曰彼是木義祖問
鋸義者何曰與師平出馬鳴却問木義者何祖曰汝
被我解馬鳴豁然省悟付法偈曰迷悟如隱顯明暗
不相離今付隱顯法非一亦非二

拖來拽去絕遮藏 木義解開汗似湯

突出本來非二一 薰風拂拂透身涼

十二祖馬鳴尊者于華氏國宣化俄有魔來與祖較力祖震伏之魔遂現形懺悔祖問汝名誰耶眷屬多少曰我名迦毘摩羅眷屬三千祖曰盡汝神力變化若何曰我化巨海極爲小事祖曰汝化性海得否曰何爲性海我未嘗知祖曰山河大地皆依建立三昧六通由茲發現迦毘聞已遂發信心付法偈曰隱顯卽本法明暗元不二今付悟了法非取亦非離

三千業力逞神奇 性海揚波總不知

無量法門由此立 盲龜值木幾人思

十三祖迦毘摩羅尊者入西印度北山之中山有大

樹蔭覆五百大龍其樹王名龍樹常爲龍衆說法祖訪之龍樹出迎曰深山孤寂龍蟒所居大德至尊何枉神足祖曰吾非至尊來訪賢者龍樹默念曰此師得決定性明道眼否是大聖繼真絜否祖曰汝雖心語我已意知但辦出家何慮吾之不聖龍樹聞已悔謝祖度付法偈曰非隱非顯法說是真實際悟此隱顯法非愚亦非智

意知心語顯真乘 滄溟由來鯤化鵬

但辦肯心承聖業 法中何慮冷如水

十四祖龍樹尊者至南印度導化時有迦那提婆來

撰述
外傳
謁將及門祖先遣侍者以滿盃水置于座前提婆見
之卽以一鍼投之而進祖後造智度等論垂世以法
眼付提婆付法偈曰爲明隱顯法方說解脫理於法
心不證無瞋亦無喜

陷虎之機不易規 當陽拈出便通津

針投水乳風前禍 爛熳山花別問春

十五祖迦那提婆尊者從龍樹祖得法後至迦毘羅
國彼有長者梵摩淨德以其子羅睺羅多隨祖出家
祖曰昔如來有記第二五百年此子當爲大教主卽
與剃髮至巴連弗城聞諸外道欲障佛法祖乃執長

幡入彼衆中彼問祖曰汝何不前祖曰汝何不後彼
曰汝似賤人祖曰汝似良人彼曰汝解何法祖曰汝
百不解彼曰我欲得佛祖曰我灼然得彼曰汝不合
得祖曰元道我得汝實不得彼曰汝旣不得云何言
得祖曰汝有我故所以不得我無我我故自當得彼
辭旣屈乃問祖曰汝名何等祖曰我名迦那提婆彼
衆夙聞祖名咸悔過歸伏祖隨告羅睺羅多而付法
眼偈曰本對傳法人爲說解脫理於法實無證無終
亦無始

因邪打正還襟懷 入水求人似有乖

二五百年傳佛記 好携瓢杖踏烟蘿

十六祖羅睺羅尊者行化至室羅筏城有河名金水寶莊嚴王之子號僧伽難提者居河之源安坐入定祖與學衆遡流而上伺之三七日難提從定起祖問曰汝心定耶身定耶提曰身心俱定祖曰身心俱定何有出入提曰雖有出入不失定相如金在井金體常寂祖曰若金在井若金出井金無動靜何物出入提曰言金動靜何物出入言金出入金非動靜祖曰若金在井出者何金若金出井在者何物提曰金若出井在者非金金若在井出者非物祖曰此義不

然提曰彼義非著祖曰此義當墮提曰彼義不成祖曰彼義不成我義成矣提曰我義雖成法非我故祖曰我義已成我無我故提曰我無我故復成何義祖曰我無我故故成汝義提曰仁者師誰得是無我祖曰我師迦那提婆證是無我難提以偈贊曰稽首提婆師而出于仁者仁者無我故我欲師仁者祖以偈荅曰我已無我故汝須見我我汝若師我故知我非我我難提心意豁然即求度脫祖曰汝心自在非我所繫語已即以大法囑付祖說偈曰於法實無證不取亦不離法非有無相内外云何起難提聞命說偈

贊曰善哉大聖者心明逾日月一光照世界暗魔無不拔

大象遊行兔徑希 義持金井涉離微

豁然心意無我我 千聖同途把手歸

十七祖僧伽難提尊者行化摩提國歷山谷間至一峯下時山舍有童子持圓鑑直造祖前祖問汝幾歲耶曰百歲祖曰汝年尚幼何言百歲童曰我不會理正百歲耳祖曰汝善機耶童曰佛言若人生百歲不會諸佛機不如生一日而得決了之祖曰汝手中者當何所表童曰諸佛大圓鑑內外無瑕翳兩人同得

見心眼皆相似其父命隨祖出家祖爲名伽耶舍多後復因風吹殿鈴聲祖問曰鈴鳴耶風鳴耶舍多曰非風鈴鳴我心鳴耳祖曰心復誰乎舍多曰俱寂靜故祖曰善哉善哉繼吾道者非子而誰卽付法眼偈曰心地本無生因地從緣起緣種不相妨華果亦復爾

圓鑑風鈴徹底清 童兒百歲語人驚

現成公案親分付 花果圓來又發萌

十八祖伽耶舍多尊者經大月氏國婆羅門鳩摩羅多之舍祖將入羅多問曰是何徒衆祖曰是佛弟子

撰述
羅多一聞佛號心神悚然卽時閉戶祖良久扣其門
羅多曰此舍無人祖曰荅無者誰羅多聞已遂發宿
智付法偈曰有種有心地因緣能發萌于緣不相礙
當生生不生

佛號纔聞卽悚神 開門元是閉門人

爲憐擊破牢關鍵 一樹寒梅劫外春

十九祖鳩摩羅多尊者適中天竺國有大士名闍夜
多問仁天暴壽逆吉義凶之故祖荅以善惡有三時
報夜多頓釋所疑祖曰汝雖已信三業而未明業從
惑生惑依識有識依不覺不覺依心心本清淨無生
滅無造作無報應無勝負寂寂然靈靈然汝若入此
法門可與諸佛同矣一切善惡有爲無爲皆如夢幻
夜多領旨卽發宿慧祖告曰吾今寂滅時至汝當紹
行化跡付法偈曰性上本無生爲對求人說於法旣
無得何懷決不決

亡羊泣路事如麻 夢幻空花總被遮

宿慧頓明諸佛義 何煩門外駕三車

二十祖闍夜多尊者至羅闍城敷揚頓教彼有學衆
惟尚辨論首者名婆修盤頭此云徧行常一食不臥六時
禮佛清淨無欲爲衆所歸祖欲度之間彼衆曰此徧

行頭陀能修梵行可得佛道乎衆曰我師精進何故不得祖曰汝師與道遠矣設苦行歷於塵劫皆虛妄之本衆曰尊者蘊何德行而譏我師祖曰我不求道亦不顛倒我不禮佛亦不輕慢我不長坐亦不懈怠我不一食亦不雜食我不知足亦不貪慾心無所希名之曰道時徧行聞已發無漏智付法偈曰言下合無生同於法界性若能如是解通達事理竟

苦行勤修路轉增 懸崖撒手事何曾

隔牆見角知牛在 一種平常繼祖燈

二十一 祖婆修盤頭尊者羅闍城人行化至那提國

王常自在問曰羅闍土風與此何異祖曰彼土曾三佛出世今王國有二師化導王曰二師者誰祖曰卽王之次子摩拏羅乃其一也吾雖德薄敢當其一時王方同祖語忽使者報有象巨萬逼城祖曰拏羅出患解矣王遂命之拏羅出城向象大喝城爲震動象皆顛仆馳散于是王大敬信命拏羅依祖出家祖授付法偈曰泡幻同無礙如何不了悟達法在其中非今亦非古

賓主相看風土揚 鄉談諺語灼然彰

衆流截斷知端的 海底泥牛趁夜光

二十二祖摩拏羅尊者行化西印度知月氏國有鶴勒那比丘堪爲法器乃躬往化之時鶴勒那以昔緣故感鶴衆相隨見祖遂問有何方便令彼解脫祖曰我有無上法寶汝當聽受化未來際卽說偈曰心隨萬境轉轉處實能幽隨流認得性無喜亦無憂時鶴衆聞偈咸飛鳴而去

衆鶴追隨業自殊 一機掣斷始無疑

飛鳴濯濯啣恩去 物外超然識得伊

二十三祖鶴勒那尊者中印度師子比丘問我欲求道當何用心祖曰汝欲求道無所用心曰旣無用心

誰作佛事祖曰若有用心卽非功德汝若無作卽是佛事經云我所作功德而無我所故師子聞已卽入佛慧祖告曰我滅後五十年北天竺國當有難起嬰在汝身今以法眼付囑于汝善自護持乃說付法偈曰認得心性時可說不思議了了無可得得時不說知

纒天網子頗相宜 打鳳羅龍驀面欺

一句了然超百億 三賢十聖那能知

二十四祖師子尊者求法嗣于罽賓國遇一長者引一子問祖曰此子名斯多當生便拳左手今二十年

終未能舒祖卽以手接曰可還我珠童子遽開手奉珠衆皆驚異長者令之出家以前緣故復名婆舍斯多祖卽告之曰吾師密有懸記罹難非久如來正法眼藏今囑付汝汝應保護普潤來際偈曰正說知見時知見俱是心當心卽知見知見卽于今祖說偈已復以僧伽黎密付斯多俾之他國斯多受教乃抵南天

捏緊拳頭二十年 纔逢識者便開拳

目前多少論訛事 只許渠儂到處圓

二十五祖婆舍斯多尊者受師子祖囑獨邁南天潛

隱山谷天德王迎供王有二子長曰德勝次曰不如密多密多和柔德勝凶暴及卽位惑外道說欲抑祖密多諫德勝囚之乃詰祖曰師子尊者已遇罽賓國王難何緣付法祖出尊者先所付僧伽黎示勝勝命焚之衣出五色光薪盡如故勝乃追悔禮祖立出密多密多遂求祖出家祖問曰汝欲出家當爲何事密多曰我若出家不爲其事祖曰不爲何事密多曰不爲俗事祖曰當爲何事密多曰當爲佛事祖曰王子智慧天至卽度出家侍祖六年乃付法偈曰聖人說知見當境無是非我今悟真性無道亦無理密多受

偈問衣可傳乎祖曰此衣爲難故假以證汝身無難
何假傳衣密多作禮

巖賓揮劍一臂墮 德勝焚衣滿面慚

迴絕是非親嫡骨 繩繩不斷語喃喃

二十六祖不如密多尊者得法至東印度王堅固敬
信于祖祖曰王國有聖當繼我法時國中有婆羅門
子年二十幼失父母不知名氏或自稱瓔珞人遂呼
爲瓔珞童子丐行間里有問汝行何急卽曰汝行何
緩問何姓卽曰與汝同姓人莫測之一日祖與王同
車而出瓔珞稽首自陳往因祖乃名爲般若多羅付

法偈曰真性心地藏無頭亦無尾應緣而化物方便
呼爲智

無頭無尾不曾藏 逼塞虛空孰敢量

瑟瑟金風輕洩漏 枝枝丹桂自芬芳

二十七祖般若多羅尊者因南印度香至王供以寶
珠祖卽取試三王子曰此珠圓明有能及否二王子
皆曰此珠七寶中尊固無踰也第三王子菩提多羅
曰此是世寶未足爲上於諸寶中法寶爲上此是世
光未足爲上於諸光中智光爲上此是世明未足爲
上於諸明中心明爲上此珠光明不能自照要假智

光光辨於此既辨此已卽知是珠旣知是珠卽明其寶若明其寶寶不自寶若辨其珠珠不自珠珠不自珠要假智珠而辨世珠寶不自寶要假智寶以明法寶然則師有其道其寶卽現衆生有道心寶亦然祖歎其辯慧乃復問曰於諸物中何物無相曰於諸物中不起無相又問於諸物中何物最大曰於諸物中人我最高又問於諸物中何物最大曰於諸物中法性最大祖時知是法器默而混之香至厭世遂依祖出家祖以其通達大法乃名菩提達磨而告之曰如來以正法眼付大迦葉如是展轉乃至於我我今囑

汝聽吾偈曰心地生諸種因事復生理果滿菩提圓
花開世界起

心明世寶別端倪 迥出人間東與西

一夜好風吹不輟 曉來黃葉與階齊

震旦

初祖菩提達磨大師受西天二十七祖般若多羅囑
識於梁普通七年來震旦初至金陵與武帝機不契
寓止嵩山少林面壁而坐人莫之測二祖慧可躬詣
求法立雪斷臂向祖問諸佛法印可得聞乎祖曰諸
佛法印匪從人得可曰我心未安乞師與安祖曰將

心來與汝安可良久曰覓心了不可得祖曰與汝安心竟可悟入越九年祖命門人曰時將至矣汝等合言所得有道副對曰如我所見不執文字不離文字而爲道用祖曰汝得吾皮尼總持曰我今所解如慶喜見阿闍佛國一見更不再見祖曰汝得吾肉道育曰四大本空五陰非有而我見處無一法可得祖曰汝得吾骨慧可出禮三拜依位而立祖曰汝得吾髓乃顧可曰昔如來以正法眼付迦葉尊者展轉囑累而至於我我今付汝汝當護持并授袈裟以爲法信付法偈曰吾本來茲土傳法救迷情一花開五葉結

果自然成

頌曰長空雲淡沒間關 月照松梢山影慳

一片清光輝宇宙 夜深兀坐聽潺湲

面壁嵩山成話墮 安心得髓恨添多

西天法印分明極 惱亂春風撼薜蘿

三祖慧可大師從初祖得法博求法嗣時三祖爲居士年踰四十不言名氏禮祖問曰弟子身纏風恙請和尚懺罪祖曰將罪來與汝懺士良久曰覓罪了不可得祖曰與汝懺罪竟宜依佛法僧住士曰今見和尚已知是僧未審何名佛法祖曰是心是佛是心是

法法佛無二僧寶亦然士曰今日始知罪性不在內不在外不在中間如其心然佛法無二也祖深器之爲之剃髮名曰僧璨付法偈曰本來緣有地因地種花生本來無有種花亦不曾生

毒流四海廣無邊 風恙纏身乞懺愆

罪性頓空三寶住 夜寒月映渡頭船

三祖僧璨大師自二祖授法深自韜晦居無常處積十餘載人無知者四祖道信時爲沙彌年始十四禮祖問曰願和尚慈悲乞與解脫法門祖曰誰縛汝曰無人縛祖曰何更求解脫乎信于言下大悟服勞九

載付法偈曰花種雖因地從地種花生若無人下種花地盡無生

受恩深處本無多 一語相投便上科

解脫法門誰縛汝 信知脫下自諍訛

四祖道信大師嗣法三祖住蘄春破頭山學侶雲臻一日往黃梅縣路逢一小兒骨相奇秀異乎常童祖問曰子何姓荅曰姓卽有不是常姓祖曰是何姓荅曰是佛性祖曰汝無姓耶荅曰性空故無祖默識是法器卽遣侍者從其母乞出家後付法偈曰花種有生性因地花生生大緣與性合當生生不生

破頭山上播真風 喜得黃梅蔦地逢

性有性無全體露 小兒原是老栽松

五祖弘忍大師前身爲破頭山中栽松道者轉遇四祖得法嗣化六祖時爲居士姓盧名慧能聞讀金剛經有省自新州來叅祖祖令隨衆作務祖一日令衆述偈意符則授衣法會下七百餘僧上座神秀者于廊壁書偈曰身似菩提樹心如明鏡臺時時勤拂拭莫使惹塵埃祖見知秀所作乃讚歎曰後人依此修行亦得勝果各令念誦盧在碓坊聞之至夜倩人于秀偈側亦書一偈曰菩提本無樹明鏡亦非臺本來

無一物何處惹塵埃祖見曰此是誰作亦未見性衆聞祖語遂不之顧逮夜祖潛詣碓坊問曰米白也未盧曰白也未有篩祖以杖擊碓三下而去盧卽三鼓入室祖密付衣法囑善保護無令斷絕付法偈曰有情來下種因地果還生無情既無種無性亦無生

本來無物頂顛開 米白倩篩滿面灰

三鼓密傳衣鉢去 刻舟爭見化龍才

六祖慧能大師黃梅得法後任曹溪南嶽讓祖來叅祖問甚麼處來讓曰嵩山來祖曰什麼物恁麼來讓無語經八載忽然有省乃白祖曰某甲有個會處祖

曰作麼生師曰說似一物卽不中祖曰還假修證否讓曰修證則不無染汚卽不得祖曰祇此不汚染諸佛之所護念汝旣如是吾亦如是祖爲說法偈曰心地含諸種普雨悉皆生頓悟花情已菩提果自成

當陽一撥遠趨風 八載投機亦不中

修證不無染不得 山叢叢處水濛濛

曹溪第二世南嶽懷讓禪師見馬祖常習坐禪師問曰大德坐禪圖甚麼祖曰圖作佛師乃取一磚於彼菴前石上磨祖曰磨作甚麼師曰磨作鏡祖曰磨磚豈得成鏡耶師曰磨磚旣不成鏡坐禪豈得作佛祖

曰如何卽是師曰如牛駕車車若不行打車卽是打牛卽是祖無對師又曰汝學坐禪爲學坐佛若學坐禪禪非坐臥若學坐佛佛非定相於無住法不應取捨汝若坐佛卽是殺佛若執坐相非達其理祖聞示誨如飲醍醐禮拜問曰如何用心卽合無相三昧師曰汝學心地法門如下種子我說法要譬彼天澤汝緣合故當見其道又問道非色相云何能見師曰心地法眼能見乎道無相三昧亦復然矣祖曰有成壞否師曰若以成壞聚散而見道者非見道也乃說偈曰心地含諸種遇澤悉皆萌三昧花無相何壞復何

成祖遂開悟心意超然侍奉九秋日益玄奧

輕輕闌外展機籌 引玉拋磚格異眸

打疊車牛三昧起 木童騎鶴上揚州

曹溪第三世江西馬祖道一禪師百丈爲侍者一日侍祖行次見一羣野鴨飛過祖曰是甚麼丈曰野鴨子祖曰甚處去也丈曰飛過去也祖遂把丈鼻扭負痛失聲祖曰又道飛過去也丈於言下有省又後侍立次祖目視繩床角拂子丈曰卽此用離此用祖曰汝向後開兩片皮將何爲人文取拂子豎起祖曰卽此用離此用丈挂拂子於舊處祖振威一喝丈直得

三日耳聾祖付法偈曰心外本無法有付非心法旣知非法心如付心法

鼻痛始知燈是火 耳聾難掩掣風顛

大千沙界文同軌 天自高兮海自淵

曹溪第四世洪州百丈山懷海禪師一日謂衆曰佛法不是小事老僧昔被馬大師一喝直得三日耳聾時黃檗聞舉不覺吐舌師曰子已後莫承嗣馬祖去麼檗曰不然今日因和尚舉得見馬祖大機大用然且不識馬祖若嗣馬祖已後喪我兒孫師曰如是如是見與師齊滅師半德見過于師方堪傳授子甚有

撰述
超師之見槩便禮拜師付法偈曰本無言語囑強以
心法傳汝既受持去心法更何言

陳年蠱毒水難當 觸着通身皮骨喪

識得根源爲活計 一般酥酪是砒礪

曹溪第五世洪州黃檗山希運禪師臨濟在師會下
行業純一首座睦州嘆曰雖是後生與衆有異遂問
上座在此多少時濟云三年座云曾叅問也無濟云
不曾叅問不知問個什麼座云汝何不去問堂頭和
尚如何是佛法的大意濟便問聲未絕師便打濟
下來座云問話作麼生濟云某甲問聲未絕和尚便

打某甲不會座云但更去問濟又問師又打濟如是
三度問師三度打濟自首座云幸蒙慈悲令某甲問
訊和尚三度發問三度被打自恨障緣不領深旨今
且辭去座云汝若去時須辭和尚去濟禮拜退座先
到師白云問話底後生甚是如法若來辭時方便接
他向後成一株大樹與天下人作陰涼去在濟辭師
師囑云不得往別處去汝向高安灘頭大愚處去必
爲汝說濟到大愚愚問甚處來濟云黃檗來愚曰黃
檗有何言句濟曰某甲三度問佛法的的大意三度
被打不知某甲有過無過愚曰黃檗與麼老婆心切

爲汝得徹困更來者裡問有過無過濟于言下大悟
云元來黃檗佛法無多子愚搦住曰者尿床鬼子適
來道有過無過如今却道黃檗佛法無多子你見個
甚麼道理速道速道濟遂築大愚脇下三拳愚拓開
曰汝師黃檗非干我事濟便回師見便問者漢來來
去去有甚了期濟云祇爲老婆心切人事了侍立師
又問什麼處去來濟云昨奉慈旨令叅大愚去來師
云大愚有何言句濟遂舉前話師云作麼生得者漢
來待痛與一頓濟云說甚麼待來卽今便喫隨後便
掌師云者風顛漢却來者裡捋虎鬚濟便喝師云侍

者引者風顛漢叅堂去後付偈曰病時心法在不病
心法無吾所付心法不在心法途

三回痛棒骨生痕 一築高安便答恩

更把虎鬚頻倒捋 乾坤攪動斗星昏

曹溪第六世鎮州臨濟義玄禪師興化爲侍者機緣
默契師以法偈印之偈曰至道無揀擇本心無向背
便如此承當春風增瞋睡化後充三聖首座次任大
覺院主云開堂日此一炷香本爲三聖師兄三聖
於我太孤本爲大覺師兄大覺於我太賒不如供養
臨濟先師

家富兒嬌無揀擇 機籌互換始承當

春風瞋睡流千古 有眼如盲目日正央

頂額豎亞摩醯眼 肘後橫懸奪命符

毒氣迸開無限意 賺他驢糞較賒孤

臨濟第二世魏府興化存獎禪師南院久依座下師

以法偈付曰大道全自心亦非在心求付汝自心道

無喜亦無憂

自心大道沒遮藏 花咲鳥啼山更長

月白不從門外得 踢翻尿器露風光

臨濟第三世汝州南院慧顛禪師風穴在會作園頭

師一日入園問云南方一棒作麼生商量穴云作奇

特商量穴却問和尚此間一棒作麼商量師拈棒云

棒下無生忍臨機不見師穴於言下大徹依止六年

師付法偈曰我今無法說所說皆非法今付無法法

不可住于法

棒下無生絕較量 臨機不見太郎當

顛翁若遇風顛漢 劈面攔腮沒處藏

臨濟第四世汝州風穴延沼禪師首山克知客時常

密誦法華一日侍立次師乃垂涕告曰不幸臨濟之

道至吾將墜于地山曰觀此一衆豈無人耶師曰聰

明者多見性者少山曰如某者如何師曰吾雖望子
之久猶恐耽着此經不能放下山曰此亦可事願聞
其要師於是上堂舉世尊以青蓮目顧視大衆迦葉
正當與麼時且道說個什麼若道不說而說又是埋
沒先聖且道說個什麼山拂袖而退師擲下拄杖歸
方丈次日山與真圓頭同上問訊師問真曰作麼生
是世尊不說說真曰鶉鳩樹頭鳴師曰你作許多癡
福作麼何不體究言句又問山曰你作麼生山曰動
容揚古路不墮悄然機師謂真曰你何不看念法華
下語付首山偈曰無說是真法其說原無說我今說

付時說說何曾說

日憂祖道淚潛潛 鐵石心肝也痛酸

拂袖一肩擔荷後 令人聞見膽毛寒

臨濟第五世汝州首山省念禪師一日上堂汾陽出
問百丈捲席意旨如何師云龍袖拂開全體現陽云
未審師意如何師云象王行處絕狐蹤陽於言下大
悟遂提起坐具顧視大衆云萬古碧潭空界月再三
撈漉始應知禮拜歸衆時葉縣省和尚作首座纔退
便問昭兄你適來見個什麼道理便與麼道陽云正
是我放身捨命處省便休師付汾陽法偈曰自古付

無說我今亦無說只此無說心諸佛所共說

皓魄當空絕點埃 一枝丹桂月中開

香飄撲着人間臭 放捨身心寔俊哉

臨濟第六世汾州太子院善昭禪師慈明叅師師揣其志經二年未許入室明每請方丈師見必詬罵或毀詆諸方及有所訓皆流俗鄙事明一夕訴曰自至法席已再夏不蒙指示但增世俗塵勞念歲月飄忽已事未明有失出家之利語未卒師熟視罵曰是惡知識敢裨販我怒舉杖逐之明伸救師驀掩其口明忽大悟曰是知臨濟道出常情服役七年辭去付

偈曰虛空無形象非虛空我所付心法空空空

不空

煨凡煉聖妙爐殷 格外鉗錘非易開

一點始知唇在口 等閒出語便驚羣

臨濟第七世潭州石霜慈明楚圓禪師自南源徙道吾石霜皆楊岐總院事岐依師雖久未有省發每咨叅師曰庫司事繁且去他日又問師曰監寺異日兒孫徧天下在何用忙爲一日師適出雨忽作岐偵師小徑旣見遂擲任曰這老漢今日須與我說不說打你去師曰監寺知者般事便休語未卒岐大悟卽拜

於泥塗問曰狹路相逢時如何師曰你且躲避我要去那裡去岐歸來日具威儀請方丈禮謝師呵曰未在一日師上堂岐出問幽鳥語喃喃辭雲入亂峯時如何師曰我行荒草裡汝又入深村岐曰官不容鍼更借一問師便喝岐曰好喝師又喝岐亦喝師連喝兩喝岐禮拜師曰此事是個人方能擔荷岐拂袖便行師付法偈曰虛空無面目心相亦然即此虛空心可稱天中天

這般家業要承當

毒藥甘漿著甚忙

幽鳥一聲相借問

春風吹綻百花香

臨濟第八世袁州楊岐方會禪師白雲端叅師一日忽問上人落髮師爲誰端曰茶陵郁和尚師曰吾聞伊過橋遭顛有省作偈甚奇能記否端卽誦曰我有明珠一顆久被塵勞關鎖今朝塵盡光生照破山河萬朵師咲而趨起端愕然通夕不寐黎明咨詢師適歲莫師曰汝見昨日打毆儺者麼曰見師曰汝一籌不及渠端復駭曰意旨如何師曰渠愛人咲汝怕人笑端因大悟于言下師付法偈曰心體如虛空法亦徧虛空證得心空理非法非心空

巧將黑豆摸明珠

鬼臉神頭見自殊

直下頓忘渠愛怕 卓然垂手御龍駒

臨濟第九世舒州白雲守端禪師浮山遠聞師頌臨濟三頓棒有過人處指五祖演見師祖請益南泉摩尼珠話師叱之祖領悟獻投機偈曰山前一片閒田地叉手可寧問祖翁幾度賣來還自買爲憐松竹引清風師印可令掌磨事一日師謂祖曰有數禪客自廬山來皆有悟入處教伊說亦說得有來由舉因緣問伊亦明得教伊下語亦下得祇是未在祖於是大疑私自計曰旣悟了說亦說得明亦明得如何却未在遂叅究累日忽然省悟從前寶惜一時放下走見

師師爲手舞足蹈祖亦一咲而已祖後曰吾因茲出一身白汗便明得下載清風師付法偈曰道我元無我道心元無心惟此無我法相契無我心

隔溪共語有來因 吹落黃花始得真

下載清風剛付汝 海門迸出一紅輪

臨濟第十世蘄州五祖法演禪師圓悟出蜀徧叅諸宿最後見祖盡其機用祖皆不諾乃謂祖強移換人出不遜語忿然而去祖曰待你著一頓熱病打時方思量我在悟到金山染傷寒困極以平日見處試之無得力者追繹祖言乃自誓曰我病稍間卽歸五祖

病痊尋歸祖一見而喜令卽叅堂充侍者方半月會
部使者解印還蜀詣祖問道祖曰提刑少年曾讀小
艷詩否有兩句頗相近頻呼小玉元無事祇要檀郎
認得聲提刑應諾諾祖曰且仔細悟適歸侍立次問
曰聞和尚舉小艷詩提刑會否祖曰他祇認得聲悟
曰祇要檀郎認得聲他旣認得聲爲甚麼却不是祖
曰如何是祖師西來意庭前栢樹子聲悟忽有省遽
出見雞飛上闌干鼓翅而鳴復自謂曰此豈不是聲
遂袖香入室通所得呈偈曰金鴨香銷錦繡幃笙歌
叢裡醉扶歸少年一段風流事祇許佳人獨自知祖

曰佛祖大事非小根劣器所能造詣吾助汝喜後悟
與佛眼佛鑑侍祖於一亭上夜話及歸燈已滅祖於
暗中曰各人下一轉語佛鑑曰彩鳳舞丹青佛眼曰
鐵蛇橫古路悟曰看脚下祖曰滅吾宗者乃克勤耳
祖付法偈曰真我本無心真心亦無我契此真真心
我我何曾我

聲前色後謾勞追 一段風流出大奇

燈滅暗中呈好手 板麟奪角上雲遶

臨濟第十一世成都府昭覺寺佛果克勤圓悟禪師
虎丘隆入室師問曰見見之時見非是見見猶離見

見不能及遂舉手曰還見麼隆曰見師曰頭上安頭
隆聞脫然契證師叱曰見個甚麼隆曰竹密不妨流
水過師肯之俾掌藏有問隆藏主柔易若此何能爲
哉師曰瞋睡虎耳付偈曰得道心自在不得道憂惱
付汝自心道無喜亦無惱

見不能及草芊芊 頭上安頭更可憐

一句峭然雲影斷 猙獰牙爪露山巔

臨濟第十二世平江府虎丘紹隆禪師住宣州彰教
時圓悟歸蜀指應菴華見師師移虎丘華侍行未半
載頓明大事師付法偈曰天晴雲在天雨落濕在地
秘密付汝心心法只這是華後任饒之報恩師忌辰
拈香云平生沒興撞着這無意智老和尚做盡伎倆
湊泊不得從此卸却干戈隨分著衣喫飯二十年來
坐曲朶木懸羊頭賣狗肉知他有甚憑據雖然一年
一度燒香日千古令人恨轉深

咄哉睡虎徹生緣 雨濕天晴花更鮮

血戰沙場人盡曉 懸羊賣狗把香然

臨濟第十三世明州天童山應菴曇華禪師密菴傑
初叅師于衢之明果師屢呵斥一日問傑如何是正
法眼傑遽答曰破沙盆師領之付偈曰佛用眼覩星

我用耳聽聲我用與佛用我明汝亦明

撥不去兮拈不來 風吹日炙賺人猜

當陽觸瞎娘生眼 獨露堂堂徧九垓

臨濟第十四世明州天童山密菴成傑禪師住鳥巨
破菴先叅師命典客一日師偶對僧舉不是風動不
是幡動先聞豁然大悟次日師遇先衆寮前問你總
不得作伎倆試露個消息看先應聲曰方丈裡有客
師呵呵大笑先侍師凡五載盡得旨要後辭歸蜀師
以偈送之曰萬里南來川蘿苴奔流度刃扣玄關頂
門戳瞎金剛眼去住還同珠走盤付法偈曰佛與衆

生見元本不隔線付法付自心非見非不見

不是風兮不是幡 平生底蘊盡掀翻

要津把住通消息 度刃奔流始徹源

臨濟第十五世夔州府臥龍破菴祖先禪師住蘇之
西華秀峯有僧入室師打逐至法堂時無準範解曰
禪和家爭禪亦常事耳師曰豈不聞道我肚饑聞板
聲要喫飯去壘準聞不覺汗流浹背師居靈隱準復
從一日侍游石筍菴菴有道者請益曰胡孫子捉不
住乞師方便師曰用捉他作麼如風吹水自然成紋
準在旁大徹付偈曰我若不見時汝應不見見見

非自心自心常顯現

江南三月趁春風 兩岸桃花映水紅

欲識渠儂真面目 鷓鴣啼在綠陰中

臨濟第十六世徑山無準師範禪師賜號佛鑑斷橋
倫祖在會下準以狗子因何有業識令祖下語凡三
十轉不契祖云可無方便乎準舉真淨頌曰言有業
識在誰云意不深海枯終見底人死不知心祖竦然
良久忽聞板聲通身汗下於是脫然準以從上源流
并付法偈曰真理直如絃何默更何言我今善付囑
表心本無得祖出世祇園遷大台瑞岩國清準于淳

祐已酉三月十五示疾集衆遺囑其徒衆請偈準乃
執筆書偈云來時空索索去也赤條條更要問端的
天台有石橋

養子之緣意自深 海枯人死要知心

板聲一擊通身脫 迥出天台亘古今

臨濟第十七世杭州淨慈斷橋妙倫禪師台州徐氏
子室中嘗舉萬法歸一示徒日隨衆務方山寶侍次
師以苜蓿根示之寶悟入師付法偈曰本無迷悟人
迷悟自家討記得少壯時而今不覺老卽繼師席
· 苜蓿拈起骨毛寒 好肉無端索灸瘢

悟得單傳真祕訣 風前總是活人丹

臨濟第十八世天台瑞岩方山寶禪師初任西庵無見叅師雖有所契未臻其極遂築室華頂精苦自勵一日作務次溟然有省平生凝滯當下冰釋遂走瑞岩呈所解方以偈證曰道人得得出山來盡把襟懷對我開坦坦平平如鏡面澄澄湛湛絕纖埃忽然得個轉身句袖卷寒雲便歸去萬八千丈華頂峯一咲裂開鐵面具家山到後絕思惟拗折身藤拄竹扉糞火堆中消息好芋香便是道香時并付法偈曰此心極廣大虛空比不得此道只如是受持休外覓

一鑑當天照影寒 瀑飛深處展眉端

虛空絕巘情難比 分付清風直下看

臨濟第十九世天台無見先覩禪師一坐華頂四十餘年足未嘗輒越戶至正賜號妙明真覺白雲度深習禪定後一策南遊徧叩禪林無有可其意者馬師說法天台欣然就謁師見器之充侍者度問西來密意未審如何師云待娑羅峯點頭卽向汝道度以手搖曳椹荅師便喝度云娑羅峯頂白浪滔天花開芒種後葉落立秋前師云我家無殘羹剩飯也度云此非殘羹剩飯而何師領之付法偈曰至大是此心至

聖是此法燈燈光不差了此心者達

虎嘯龍驤山勢險 西來密意灼然酬

殘羹剩飯都掀却 百億須彌笑點頭

臨濟第二十世處州福林白雲智度禪師初住普慈
諸刹洪武已酉應召尋隱福林平昔機語不容人錄
古拙俊侍師室中了明大事深契牧牛之作乃付法
偈曰心中有自心中法中有至法我今可付囑心法無
心法

幃幄坐籌聲價重 不容禪販出常情

其中有個真消息 戴角披毛異類行

臨濟第二十一世太平府繁昌八峯山古拙俊禪師
無際叅師問還我照用來際云若有照用卽成障碍
師云這厮着空佛也救不得際云有無俱寂滅空佛
悉皆非後示以偈云憶昔繁昌一別時此心能有幾
人知無絃曲子真堪續慧命懸懸付阿誰付法偈曰
一道不心光三際十方明何于明白中有明有不明
年老婆心徹底枯 翻雲覆雨驗諍訛
繁昌嫡脉今猶在 空佛俱非唱哩囉
臨濟第二十二世川東普州道林無際悟禪師別號
蠶骨蜀中人也年二十出纏縛竹爲菴研勵無懈四

撰述
指大書帖亦不顧只是拍盲做鈍工夫後得大徹大悟卽呈本師偈云寂照無上下光明處處通本來無皂白無處不含容正統九年應 召說法 上大悅師嘗以無字公案示徒月溪澄久依座下深得奧旨待書月溪二字法語示之并付法偈云我無法可付汝無心可受無付無受心何人不成就

慣將無字立關樞 殺活縱橫似太阿
一段寒輝親入手 等閒拈出斬痴魔

臨濟第二十三世南京大崗月溪澄禪師景泰三年勅賜回大崗號慈善一日室中出祖衣示徒乃云此

衣是唐朝宮王所置今八百餘年矣祖祖相傳至東普先師普付與老僧若是克家種子方堪紹荷狐假虎威焉敢希冀又云如百丈侍馬祖祖侍南嶽嶽侍曹溪六祖皆久久親炙磨光剗銳乃能豁徹重關羈鎖掃盡微見窠臼深得大機大用可爲人天眼目耳師居嘗凡見僧請益乃云佛法不是鮮魚怕爛却那卽趣出夷峯寧侍傍忽悟入師付衣法偈云心卽能知心法卽可知法今所付法心非心亦非法

授受僧伽古至今 克家方許示叢林
幸然不是鮮魚物 留得宗風不墜鍼

撰述
卷之四
臨濟第二十四世大崗夷峯寧禪師寶芳住天目徃
叅師噐之乃付法偈云祖祖無法付人人本自有汝
受無付法急着傳於後

大地山河驀入官 松風水月不相瞞

滔滔只要源頭活 何慮人間滄海乾

臨濟第二十五世天目寶芳進禪師示衆云拈花微
咲節外生枝面壁安心畫蛇添足山僧這裡無禪可
叅無道可學直教一個個成佛作祖去汝等還信得
及麼良久拍膝云劍號巨闕玉出崑崗付野翁曉法
偈云真性本無性真法本無法了知無法性何處不

通達

好兒終不使爺錢 便把家私徹底掀

無限風光遮不住 東西南北有知恩

臨濟第二十六世嘉興東塔野翁曉禪師無趣叅每
呈見解師盡與掃闢昔日所負直使索然一日師謂
趣云我有一言要與爾說趣便問師但咲而不語趣
又問師又咲趣不諳旨遂禮拜懇求師不得已乃云
達磨西來直指人心見性成佛唯在直下體取子若
信得及可放下萬緣叅個萬法歸一趣領旨後聞雞
鳴有省卽薙染師乃付法偈云非法非非法非性非

支那

卷之四

三

非性非心非非心付汝心法竟

舌頭無骨覓知音 笑裡藏刀意更深

直使萬緣俱放下 雞鳴方契祖師心

臨濟第二十七世嘉興敬畏無趣如空禪師無幻叅師誨以教外別傳之旨朝夕叅究有所契入遂薙染結庵徑山集無趣語錄徃見趣趣問子向在甚麼處幻曰徑山趣曰做得甚麼事幻曰某甲買得一段田收得原本契書請和尚僉押即將集本呈上趣接得展看曰者個是我的汝的響幻曰和尚莫搶奪行市趣便擲下集本幻便出復呈偈趣曰非語言文字也

是汝作底麼幻曰某甲鼓粥飯氣若謂有所得辜負和尚不少趣乃點首卽付法偈云師傳拈花宗示我微咲法親手展付汝持奉徧塵刹

重重勘問別親疎 號段分明總不孤

點首契書收拾起 不愁田地致荒蕪

臨濟第二十八世徑山無幻性冲禪師初住車溪後開法徑山示衆云老漢本擬深藏鄉僻遣過生緣爭奈無趣老人有不了底公案山僧出來與他了却僧問如何是無趣老人不了底公案師便打僧云某甲有甚過師云殃及兒孫南明掩關興善師至關前勘

問南將前工夫舉似師跌足云悔我來遲向後總欲到此不易得也南卽啓關往謁于車溪徑山服勤八載一日於地上拾片紙有觀方知彼去者不至方之句有省呈無幻幻乃印可卽命充首座付法偈曰得本無所得傳亦無可傳今付無傳法東西共一天塔于徑山

扣關跌足不無胎 刻骨銘心去復來

八載途中親薦得 寒梅徧向雪中開

臨濟第二十九世興善南明慧廣禪師徑山示衆云五峯頭卓朔雙徑尾巔先喝石崑一任踣跳明月池

覆地傾天此四句中有一句有殺人刀無活人劍有一句有活人劍無殺人刀有一句殺入刀活人劍俱有有一句殺入刀活人劍俱無伶俐僧檢點得個儻分明許你一生叅學事畢普明鴛湖初謁無幻于車溪開示禪要後侍南明于徑山一日闍思益梵天經有省卽呈無生偈曰鐵壁銀山誰敢摧賊身驀地撥將來相看元是舊相識當下慚惶咲臉開又曰歷劫多年窮苦事風光流得到今朝笙歌車馬門如市內院依然鎖寂寥南闕之痛加呵斥更不作偈頌南後掩關臯亭諸處不離左右一十三載值南病篤一

撰述
日舉香嚴獨脚頌問明明纔開口南便喝明復擬開口南又喝明方點首南卽付法偈云無傳無受法無傳無受心付與無手者掣斷虛空筋

啐啄同時血也枯 命根不斷奈伊何

特然啄破琉璃殼 別有超宗異目多

臨濟第三十世建寧普明玄微妙用禪師別號鴛湖初任嘉興白苧普明寺及桐月庵介菴進往叅師卽垂誨便有師資之契菴因臥疾忽聞匠斧斫大木聲有省卽呈萬如和尚萬頷之後聞師在建寧普明及侍萬入山請師陞座扣問師云不須更問山中事觀

見容顏便得知菴便禮拜未幾辭往曹山再叅師於普明卽命入室菴方跨門師云是甚麼菴擬荅師震威便喝菴豁然契悟卽掩耳而出一日師欠安菴侍次師命茶問云汝字覺先喚甚麼作先菴云且喜今日得自在師云如何是覺後菴云請和尚尊重師云你還分得先後麼菴良久師便喝菴云某甲只管喚茶師云如何是喫茶底事菴云柿棗腐乾都在這裡師云你作麼生菴云却被某甲一口食盡師云滋味如何菴云甜者自甜鹹者自鹹師云未在更道菴云某甲謝茶便禮拜師深喜之又一日師集衆乃舉拂

撰述
子云世尊拈一枝花老僧舉一枝拂且道是同是別
菴出禮三拜歸位師云這瞎驢遂擲下卽出從上源
流衣拂并書法偈付云沿流一段事竟無頭與尾付
與師子兒哮吼滿大地師于崇禎壬午十月十一日
說偈而化嗣法者三人菴出世嘉興金明寺

頌曰舊債思耐驀擲竿 電光石火逼人寒

死骷髏上開活眼 拋出當陽一任看

冷灰豆爆忽擡眸 薄暮晴空月一鉤

長嘯一聲天地動 不風流處也風流

介菴禪師源流頌

諸鄉紳請啓

伏以高懸法印拈花啓不立文字之傳直指真宗折
葦唱與汝安心之旨一隊老古錐弄死蛇而解活千
年陳骨董觸臭氣以如新以至化被人天良繇道窮
思議雖禪學於今爲盛然孤高傑出者誰恭惟

介菴大禪師座下派衍滄沱脈承鴛水上振斷橋偷
祖之家風數百載而洪力肩敬畏趣翁之公案咫尺
間而近林下水邊久潛道用湖濱范里大鍛聖凡全
機施設英靈漢匍匐歸降赤體提持門外人皈依乞
命唱出無生雷音普聞於海內備揚家醜道眼卓絕

乎諸方斯真末世之津梁法門之柱石也默等向沾
法味素飫玄譚固宜金明作略遐邇皆知猶恐威德
韜藏趨踰或後伏願慈悲一切毋論已到未到盡與
肺腑清涼徹底爲人不問明頭暗頭咸令腦門迸裂
使野干盡吐狐涎湧出當空杲日獅王不行兔徑果
然世躋平康臨楮曷勝翹企懇切之至

法末譚貞默曹 溶張晉徵吳 鑄莊 鱗朱茂時

錢 江戴長治汪 挺李丹衷沈闕劭何元英

許宗渾朱 介曾王孫嚴 勳姚原瀉徐李熊

吳源起項 謙金大起黃士傑 全頭首拜

久
七
七